



GOVERNUN KONSTITUSIOLNÁL IV SEKRETARIA ESTADU KONSELLU MINISTRU

KOMUNIKADU BA IMPRENSA

Sorumutu Konsellu Ministru nian iha loron 25 fulan Maiu tinan 2011

Konsellu Ministru hala'o sorumutu iha loron Kuarta ne'e, loron 25 fulan Maiu tinan 2011, iha Sala Sorumutu Konsellu Ministru nian, iha Palásiu Governu, iha Dili, no halo aprovasaun ba:

1. Dekretu-Lei ne'ebé kria TIMORGAP – Timor Gás & Petróleo, E.P.

Konsellu Ministru aprova ona kriaun ba TIMORGAP – Timor Gás & Petróleo E.P. (TIMORGAP, E.P.), ho finalidade atu hela no jere, ho enkuadramentu ida no prinsípiu sira ho natureza empresariál, ativu sira propriedade Estadu Timor-Leste nian iha setór minarai tuir lei haruka. Empreza públika sei hala'o nia atividade komersiál sira kona-ba setór minarai.

Knaar hirak ne'ebé mak uluk hala'o ona husi órgaun administrasaun direta ne'ebé responsável ba minarai, iha Sekretaria Estadu Rekursu Naturál nia laran, kona-ba atividade sira ne'ebé empresariál, maibé agora sei transfere fali knaar hirak ne'e ba TIMOR-GAP, E.P. tuir diploma ida ne'e no nu'udar empreza públika, órgaun Governu nian ne'ebé sai nu'udar autoridade legál ba asuntu ida ne'e mak sei iha poder atu halo kontrolu legalidade nian ba ninia lala'ok sira.

TIMOR-GAP, E.P. bainhira hala'o nia atividade ekonómika hirak ne'e, nia sei kumpri nafatin, no kompromete atu proteje Saúde, Seguransa no Ambiente no promove Responsabilidade Sosial.

2. Dekretu-Lei kona-ba Importasaun Veikulu sira

Diploma ida ne'e atu hodi regula kondisaun no prosedimentu sira kona-ba importasaun veikulu sira. Dekretu-Lei ne'e, hanesan regulamentasaun ida ne'ebé importante bainhira atividade ida ne'e bele hamosu promosaun ba desenvolvimento ekonómiku.

Define ona karaterística veikulu sira nian ne'ebé atu importa mai Timor-Leste, ho hanoin ida atu proteje konsumidór no meu ambiente. Nunu'e mós estabele ona sistema préviu autorizasaun kona-ba importasaun veikulu sira nian atu bele halo kontrolu efikás kona-ba operasaun sira importasaun nian no

estabele sistema ida ne'ebé bele halo verifikasaun ba veikulu sira ne'ebé lori ba País sei respeita karaterística técnica hirak ne'ebé define tiha iha lei.

3. Proposta Lei ne'ebé aprova Rejime Transítóriu Seguransa Sosiál nian

Diploma ida ne'e estabelece rejime transítóriu ida kona-ba seguransa sosiál, liuliu atu garante traballadór Estadu nian no familiár sira ne'ebé depende ba sira, nia nesiedade bázika protesaun sosiál nian. Maske sei sai nu'udar hela transítóriu, maibé rejime ida ne'e sei hahú hala'o rejime ida kona-ba seguransa sosiál iha Timor-Leste no sei sai nu'udar pasu dahuluk ba dezvoltamentu sistema universál ida nian.

Elabora ona rejime ida ne'e ho baze ba proposta hosi Grupu Traballu Interministeriál, ne'ebé hetan aprovasaun tiha ona iha Konsellu Ministru iha tinan 2010, ne'ebé determina katak rejime transítóriu seguransa sosiál nian ne'e tenke tuir modelu sistema úniku no repartisaun simples nian.

Diploma ida ne'e sei asegura direitu traballadór Estadu nian atu hetan pensaun bainhira to'o ona ferik no katuas, pensaun tanba invalidés no pensaun sobrevivénsia (bainhira traballadór mate) ba familiár sira ne'ebé depende ba traballadór Estadu nian ne'e.

Konsellu Ministru halo mós análise kona-ba:

1. Política ba Enerjia Rural no Eletifikasaun Rural

Sekretaria Estadu Política Enerjética apresenta ona Projeitu kona-ba Política Eletifikasaun Rural ba Konsellu Ministru ho objetivu atu halo enerjia renovável hanesan fonte esensial ba rendimentu comunidade rural sira nian. Halo konsumu ba enerjia ida ne'e atu hodi bele hadi'a di'ak liután qualidade moris comunidade sira nian iha nível sosiál, ekonómiku no kulturál hanesan fatór importante atu País ne'e bele kontinua desenvolve ho forma ne'ebé estável, armoniza no demokrátika.